

## **Inuussutissarsiorneq piginnaasallu ineriartortinnissaat pillugit Namminersornerullutik Oqartussat nalunaarutaat nr. 10 ulloq 15. april 2008-meersoq**

Inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit Inatsisartut peqqussutaat nr. 2, 31. maj 1999-imeersoq, § 7, imm. 2 aamma § 49 naapertorlugit aalajangersarneqarpoq:

### Siunnersuisoqatigiit siunertaat suliaasaallu

**§ 1.** Naalackersuisut inuussutissarsiutinik ilinniartitaanermi piginnaasat ineriartortinnissaat pillugit Naalackersuisunut siunnersuisussanik pilersitsisapput, suliffeqarnermi inuussutissarsiutinullu ilinniartitaanermi suliaasaqarfiit ineriartortinneqarnissaat siunertaralugu, aammalu inuussutissarsiutini ineriartortitsineq, suliffeqarnermi ineriartortitsineq inuussutissarsiutinullu ilinniartitaanerup iluani ineriartortitsinermi suliniutit ataqatigiissaarneqarsinnaaqqullugit.

Imm. 2. Siunnersuisoqatigiit inassuteqaateqartassapput suliaassani Naalackersuisunit saqqummiunneqartuni. Siunnersuisoqatigiit nammineeurlutik suliaassani suliaasaqarfimminnut attuumassuteqartutut isigisaminni suliaqarsinnaapput.

Imm. 3. Siunnersuisoqatigiit inassuteqarnerminni tikkuaasinnaapput pissutsinut atuuttunut misissueqqissaarnissamik takussutissiortitsinissamillu pisariaqartitsiviusuni, tamatumunnga ilanngullugit ajornartorsiutit piffinni ataasiakkaani nunallu immikkoortuini pisut.

Imm 4. Siunnersuisoqatigiit ukiumoortumik kingusinnerpaamillu 1. april Naalackersuisunut suliniutitik pillugu aammalu suliaasaqarfimmi iluani ineriartorneq pillugu nalunaaruteqartassapput.

**§ 2.** Siunnersuisoqatigiit sulinerminni:

- 1) Ingerlatseqataassapput ataqatigiissaareqataallutillu, suliffeqarnermi illuatungeriit akornanni, inuussutissarsiornerup, suliffeqarnerup inuussutissarsiutinullu ilinniartitaanerup suliniuteqarfigineqarnerani.
- 2) Inuussutissarsiornerup uummaarissup pilersinneqarnissaata ineriartortitsinikkullu suliffeqarnerup eqaatsumik ingerlasuunissaasa aqutissiuunneqarnissaat anguniassavaat, aammalu inuussutissarsiutinik ilinniartitaanerup immikkuullarissamik nalinginnaasumillu piginnaasanik ineriartortitsinermik eqqanaarisup pilersinneqarnissaa aqutissiuutissallugu.
- 3) Suliffeqarnermi ilinniartitaanermilu piffissami sivikitsumi atuuttussanik siunissarlu ungasinnerusoq eqqarsaatigalugu piginnaasanik ineriartortitsinissamik pisariaqartitsinerup aqqiivigineqarnissaa anguniassavaat, tassungalu ilanngullugit piginnaasat ineriartortinnissaanni tulleriiarinissamat siunnersuuteqartassallutik.
- 4) Suliniutinik inatsisiliornikkullu ilusilersuinernik siunnersuusiortassapput, taakku aqutigalugit sulianik ingerlatsinermi illuatungeriit pisortallu piginnaasat ineriartortinneqarnissaannut pisariaqartitsiffiusuni aningaasaleeqataanissaannik kajumilersinneqaaqqullugit.

- 5) Siunnersuinerminni inuuneq naallugu ilinniarnermik oqartarnerup naleqquttumik pilersitsinikkut imaqartinneqarnissaa anguniassavaat.
- 6) Nunami tamarmi inuussutissarsiornikkut ineriartortitsineq, inuussutissarsiutinik ilinniartitaanermi suliffeqarnermilu suliniutit malittarissavaat, aammalu inuussutissarsiutit ineriartortinneqarneranni killiliussassanik aqutissiuussisassallutik, suliffeqarnerup inuussutissarsiutinullu ilinniartitaanernut eqaatsumik iluseqartinneqarnissaat aqutissiuutissallugu, sulisullu piginnaasaannik ineriartortitsinissaata eqqanaarneqarnissaa peqataaffigissallugu.
- 7) Inuussutissarsiutinik ilinniartitaanerup ineriartortinneqarnera malittarissavaat, ilinniartitaanerillu pitsaassusaat, ineriartortinneqarnerat, naleqqussarsinnaassuseqarnerat ilinniakkallu ataasiakkaat immikkoortuini ataqatigiissarineq pillugu innersuussisassallutik.
- 8) Ilinniartitseqqittarnerni piginnaasallu ineriartortinnissaat inuussutissarsiornikkullu ineriartortitsineq pillugu pilersinneqartut ilusilersorneqarsimanerisa nakkutigineqarnerat peqataaffigissavaat siunnersuiffigissassallugulu.
- 9) Ineriartortitsineq pilersitsiortornerlu pillugit siuarsaataasinnaasut aaqqiissutit ilaatinneqarnissaat isumagissavaat, suliniutinik ilinniartitaanermi aammalu suliffeqarnermi inuussutissarsiutinillu siuarsaanermut attuumassuteqartuni.
- 10) Sumiiffinni ataasiakkaani, nunallu immikkoortuini attuumassuteqartut peqatigalugit, inuussutissarsiornernerup ineriartortinneqarnerani, suliffeqarnermi aammalu inuussutissarsiutinut ilinniartitaanermi suliniutit aqqissuunneqarnerannut siunnersuuteqartassapput, aammalu piffinni ataasiakkaani nunallu immikkoortuini suliniutit nuna tamakkerlugu suliniutinut tulluarsarneqarnerat peqataaffigissallugu.

*Siunnersuisoqatigiit inuttalersugaanerat inissitsiternerallu*

§ 3. Siunnersuisoqatigiit ilaasortaqrput siulittaasumik Naalakkersuisunit toqqarneqartumik aammalu matuma kinguliani taaneqartunit kattuffinnit pisortaqarfinniillu sinniisumik kingoraartissamillu toqqarneqartunik:

- 1) NUSUKA.
- 2) Sulisitsisut peqatigiiffiat (GA).
- 3) ILIK.
- 4) Sulinermik Inuutissarsiuteqartut Katuffiat (SIK).
- 5) KANUKOKA (Ikaarsaariarnermut ataatsimiititaliat 1. maj 2008 pilersinneqarnissaasa tungaannut, tamatuma kingorna kommunit sisamaasut tamarmik sinniisaannik).
- 6) Sanaartornermik Ilinniarfimmi forständerit, kiisalu ilinniarfiit teknikimik ingerlatsiffiusut sinnerlugit Saviminilerinermik Ilinniarfik.
- 7) Inuussutissalerinermik ilinniarfiit sinnerlugit ATI-p aamma INUILI-p forständerii.
- 8) Niuernermik, kiffartuussinermik, aqutsinermik IT-millu ingerlatsiffiit sinnerlugit Niuernermik Ilinniarfiit forständerii.
- 9) Takornariaqarnermut Inuussutissarsiornermullu siunnersuisoqatigiit.
- 10) Teknikikkut siunnersuisartut peqatigiiffiat.

Imm. 2. Immikkoortoq 1-mi pineqartut ilaasortat saniatigut Inuussutissarsiornermut Naalakkersuisoq pisinnaatitaavoq ilaasortamik siunnersuisoqatigiit suliaannut attuumassuteqartunik

ilisimasaqartumik toqqaanissaminut.

Imm. 3. Ilaasortat imm. 1, nr. 6-8-mi pineqartut brancheudvalgiini siulittaasut imaluunniit ilinniarfiit forständeriisa akornannit toqqaarneqartassapput.

Imm. 4. Siunnersuisoqatigiinni ilaasortat toqqaarneqatassapput qinigaaffimmut ukiunik sisamanik sivilissuseqartumut.

Imm. 5. Siunnersuisoqatigiit akunnerminni siulittaasumut tulliusussamik toqqaasassapput. Siunnersuisoqatigiit siulittaasuata peqanngiffiini siulittaasup tulliaata ataatsimiinneq aquttassavaa.

Imm. 6. Siunnersuisoqatigiit suliffeqarfinnit ukunanga ataatsimeeqataasartumik ilaqartinneqassapput:

- 1) Aningaasarsiornermik ingerlatsiviit.
- 2) Kalaallit Nunaanni takornariaqarnermi inuussutissarsiornermilu siunnersuisoqatigiit.
- 3) Greenland Venture.
- 4) Kalaallit Nunaanni naatsorsueqqissaartarfik.
- 5) Inuussutissarsiornermut, Suliffeqarnermut Inuussutissarsiuutinullu Ilinniartitaanermit Naalakkersuisoqarfik.

Imm. 7. Siunnersuisoqatigiit imm. 6-imi taaneqartut ataatsimeeqataasartut saniatigut ataatsimeeqataasartussanik toqqaasinnaapput, ataatsimiinnermi immikkut oqaluuserineqartunut ilisimasalinnik.

#### *Ataatsimiinnerit*

§ 4. Siunnersuisoqatigiit ukiumut minnerpaamik sisamariarlutik ataatsimiittassapput.

Imm. 2. Siunnersuisoqatigiit immikkut ittumik ataatsimiittassapput;

- 1) Naalakkersuisut piumasarippassuk,
- 2) siulittaasup pisariaqartippagu, imaluunniit
- 3) ilaasortat amerlanerussuteqartut siunnersuutigippassuk.

#### *Suleriaasissaq*

§ 5. Naalakkersuisut siunnersuisoqatigiit suleriaasissaat aalajangersassavaat.

#### *Allattoqarfik*

§ 6. Inuussutissarsiornermut, Suliffeqarnermut Inuussutissarsiuutinullu ilinniartitaanermit Naalakkersuisoqarfiup siunnersuisoqatigiit allaffissornikkut sullinneqarnerat isumagissavaat.

#### *Aningaasalersorneqarnera*

§ 7. Siunnersuisoqatigiinnut ilaasortaaneq akissarsiaqarfiunngilaq. Siunnersuisoqatigiit suliaannut aningaasartuutit Inuussutissarsiornermut, Suliffeqarnermut Inuussutissarsiuutinullu Ilinniartitaanermit Pisortaqarfimmit akilerneqartassapput. Kisiannili angalanerut najugaqarnernullu aningaasartuutit ilaasortanik ataatsimeeqataasartunillu toqqaasimasut aningaasartuutigisassavaat, Naalakkersuisut

immikkut ittumik ataatsimiittoqarnissaanik piumasaaqateqarsimannippata.

*Atortuulersitsinermik atorunnaarsitsinermillu aalajangersakkat*

§ 8. Nalunaarut 1. maj 2008-mi atuutilersinneqarpoq.

Imm. 2. Ilutigitillugulu Namminersornerullutik Oqartussat nalunaarutaat Piginnaasat pillugit siunnersuisoqatigiit pillugit nr. 3, 8. marts 2007-imeersoq atorunnaarsinneqarpoq.

Namminersornerullutik Oqartussat, *ulloq* 15. april 2008

Siverth K. Heilmann

/

Bent A. Sørensen